

Fjármála- og efnahagsráðuneytið
Arnarhvoli Lindargötu
101 Reykjavík

sent á samráðsgátt

Reykjavík, 5. júní 2020

Mál: Umsögn um drög að reglugerð um tímabundna endurgreiðslu virðisaukaskatts af vinnu manna

Samtök atvinnulífsins (SA) hafa tekið til umsagnar ofangreinda reglugerð sem birt var á samráðsgátt stjórnvalda 24. maí sl. Reglugerðin verður sett með heimild í 6. mgr. bráðabirgðaákvæðis nr. XXXIII og 5. mgr. bráðabirgðaákvæðis nr. XXXIV við lög nr. 50/1988, sbr. 7. gr. laga nr. 25/2020 um breytingu á ýmsum lögum til að mæta efnahagslegum áhrifum heimsfaraldurs kórónuveiru. Með bráðabirgðaákvæðunum var veitt tímabundin heimild til 100% endurgreiðslu virðisaukaskatts af vinnu manna við íbúðarhúsnæði, frístundahúsnæði, mannvirkja í eigu tiltekinna félagasamtaka og bílaviðgerða.

SA fagna breytingunni en gera eftirfarandi athugasemdir við reglugerðardrögin.

1. Óskýr skilyrði

Í 3. og 4. gr. reglugerðardraganna er að finna almenn og sérstök skilyrði fyrir endurgreiðslu virðisaukaskatts. Í báðum tilvikum segir að skilyrði fyrir endurgreiðslu séu „m.a. eftirfarandi.“ Í bráðabirgðaákvæðum nr. XXIII. og XXXIV. laga nr. 50/1988 er með nokkuð skýrum hætti fjallað um endurgreiðslu virðisaukaskatts í nánar tilgreindum tilvikum á tímabilinu frá 1. mars 2020 til og með 31. desember 2020. Með reglugerð er ráðherra heimilt að útfæra framkvæmd endurgreiðslunnar.


Það er mikilvægt að skilyrði fyrir endurgreiðslu séu skýr og tæmandi talin í reglugerðinni. Með því orðalagi sem viðhaft er í 3. og 4. gr. reglugerðardraganna, sbr. „m.a.“, er opnað á þann möguleika að endurgreiðslan sé bundin frekari skilyrðum en þar er að finna. Óljóst er hver mun setja þau skilyrði eða í hvaða tilvikum þau eiga við. Sama orðalag má finna í 5. gr. reglugerðardraganna þar sem segir að virðisaukaskattur fái ekki endurgreiddur „m.a. af eftirtöldu:“

Reglugerðinni er ætlað að útfæra tímabundna reglu sem er liður í að mæta þeirri efnahagskreppu sem nú ríður yfir. Í þeim bráðabirgðaákvæðum sem reglugerðin sækir stoð í er kveðið á um skyldu til endurgreiðslu. Ef binda á þá skyldu við ákveðin skilyrði er nauðsynlegt að reglugerðin eða lagaákvæðið sjálft kveði skýrt á um þau skilyrði og að ákvæðum reglugerðardraganna verði breytt þannig að skilyrðin séu þar tæmandi talin.

2. Jarðvinna

Samkvæmt c-lið 5. gr. reglugerðardraganna er virðisaukaskattur ekki endurgreiddur af vinnu stjórnenda skráningarskyldra ökutækja, stjórnenda farandvinnuvéla og vinnuvéla, sem skráningarskyldar eru í vinnuvélaskrá, á byggingarstað. Þannig er jarðvinna undanskilin frá úrræðinu. Jarðvinna er í mörgum tilvikum stór hluti af þeirri vinnu sem unnin er á verkstað. Endurgreiðslu virðisaukaskattsins er m.a. ætlað að hvetja til nýframkvæmda og því óskiljanlegt að undanskilja jarðvinnu. Að mati SA ætti að endurskoða þetta ákvæði þannig að það nái jafnframt til jarðvinnu.

Virðingarfyllt,
f.h. Samtaka atvinnulífsins



Heiðrún Björk Gísladóttir